

巢民文集

巢民文集卷之一

雉皋冒襄辟疆著

賦

銅雀瓦賦

魏帳未懸鄴臺初築複道袤延綺窗交屬雕甍繡
棟矗十里之妝樓金埒銅溝響六宮之脂盞庭棲
比翼之禽戶種相思之木馭娑前殿遜此清陰栢
梁舊寢喟其跼蹐無何而墓田渺渺風雨離離泣
三千之粉黛傷二八之蛾眉雖有彈碁愛子傅粉

佳兒分香妙伎賣履妖姬與夫楊林之羅襪西陵
之玉肌無不烟銷灰滅矢激星移何暇問黃初之
軼事銅雀之荒基也哉乃有遺瓦如舟綉箔似錯
德儷玄泓聲諧松壑醉素畱草聖之墨痕顛米鐫
秘書之寶閣光澤瑩膩古灝磅礴見之三十九年
以前撫焉千四百載如昨唐宋文房此爲鼻祖西
京玉質還其大朴已焉哉春草黃復綠漳流去不
還只有土花畱碧在曾向高臺覆玉顏

後蕪城賦

試望南州雲拱神京周綿江海駸駸丘陵四會九
突五達嶢嶢天分牛女地軸崑崙是以廣衍沃野
周池濬湫都城千雉層樓百尺嵒嶙結嵎嶢峭繩
直虹采委蛇墨陽厲革攻守齊備高卑不一邑屋
爛熳工賈紛集固護永基君民咸益加以魚鹽富
金錫繁修世休命岡陵永存其中耽耽帝宇煌煌
綺櫳玉填金壁鐵鳳蒼龍殊形異製渥彩流虹更
有崇樓間閣別寢離宮裒以藻繡蒞若椒風張吳

飲之繁會樂鄭舞之躑躑逸游妙戲巧捷連翩至
于紫幌通河翠簾引月銀缸燦曜金絡蟬聯青娥
皓齒蘭儀令顏又若石橋吹臺羅幙駢屏靚裝袷
服遊覽郊垌連輿接席解帶披襟當茲全盛之日
誠愉樂而多情豈越歷朝而下值喪亂之屢經何
當六百餘載更烽烟之未寧懔鋒鋌以格鬪焚琬
琰于疆場狼烟日熾天塹羅殃怒雨慘烈迅風飄
颺虎臣稜威而燠灼孤忠碩畫以愴惶勢分魚貫
陳列雁行豈八靈之震懼奈九峻之蒼茫兵戈震

盪甲士流亾青燐熒熒白骨如霜叢蘿彌蔓榛棘
旁唐瓊臺少色月觀無光柳衰隋苑釵沒雷塘木
魅晨走山鬼夜藏樓臺旣傾圯城郭復淒涼時會
變化天運靡常人生視此能不悲傷若夫東閣西
亭重欒湮沒釣臺輿浦磴道已灰周覽者撫軫軼
而傷懷弔古者望曜靈而心摧伊鬱誰訴對此盤
廻乃遺音莫按夜月春花陳娥隋艷盡委泥沙旣
傷反側後此空嗟我心孔棘曷爲可已憶文選之
樓悵太傅之里遺風欲追悵惘徙倚俯念今日埃

塵莫起柳垂陰車漸止月滿橋歌才始梅花芍藥
賴有騷人雲山甘泉徒存舊址山川改色於邑若
何賦此已終復作蕪城之歌歌曰四悵白雲兮宮
殿頽丘陵草萊兮松栢摧城上烏啼兮聲哀令人
悼悵兮傷懷

巢民文集卷之二

雉皋冑襄碎疆著

序

評點謝康樂遊山詩序

謝康樂遊山詩三十一首益以與廬陵王義真書
俞范光祿第二書與弟二書并遊名山志暨六朝
來評謝諸家彙爲一帙繼柳柳州遊山記杜少陵
夔州詩後刻之歲辛巳憶余省覲趨南嶽曾手錄
此詩于富春道中碧石紅潭青簾白舫蓬窗繕寫

極不能忘乙酉避難秦海長夏轉徙張螺浮大白
居又細加評釋他鄉兵火中艱危萬狀然余日夕
此編高吟默誦與金戈鐵戟相斷續卽竄身谿谷
攀蘿附葛時恒懷之不置也余之傾倒于康樂至
矣嗣遭大掠生平手目所經細帙盡歸兵燹徒爲
浩歎癸巳秋構小三吾於水繪菴成委懷丘壑擬
盡搜古人登臨詩文聚于斗室顏董思白先生爲
余書澄懷觀道小額于上以當臥遊然盤臆穿胸
尤以謝客爲第一日覺奇秀之氣往來几席間居

無何復以蠅頭蠶尾小書一冊畱之吟篋以娛卒
歲乙未秋楚竟陵譚灌湘以世好過訪見此書愛
而欲攫之余未忍釋也後灌湘別去數千里外重
託其令兄只收寄語殷殷以謝詩素冊爲念余知
故人意良厚卒歸之嗟乎計余生平往返三吳楚
蜀虔粵之交舟車萬餘里所見山川英麗甲天下
其間雲霞之出沒草木之蓊翳陰晴昏旦之變幻
禽魚鳥獸之情形又不能數已也每遣景詠歌所
不能寫者覽謝詩則撫掌快心若道余意中事迄

于今余將老矣十八年來足跡未嘗越三百里外
然披賞是編若見夫彭蠡匡廬之奇秀焉瀟湘雲
夢之清綺焉閩斤竹澗之詩諷富春渚之作如聽
巴猿峽雁之啁啾于耳焉巫雲峨雪之紛霏于目
焉曩遊固未邈也余之于康樂也殆將以此而終
老乎至其詩略盡彙評注中不復論是爲序

今文選序

戊戌冬杪余友陳定生子其年來東臯與禾丹兩
兒讀書水繪園其年今世之孔璋也詩賦麗則銘
頌綺密自其羈貫時卽號海內上流顧獨折節於
余於兩兒雅弟畜之戊戌迄辛丑陳子在吾臯四
載矣每見其中箱中有今文選一書朱墨狼籍縑
緗稠雜取而讀之則此四載中陳子與兩兒朝夕
選集者也余觀其首尾明淨酷有裁制蕭氏高齋
以後罕覩此書因不揣鄙固間爲叅酌歷幾歲月

益爾完好濟南王阮亭使君見而稱之譽均隋璧
文奏之暇復加甄汰得文八卷賦序諸體共如千
篇余廼鬻負郭田付梨棗焉梓成余顧謂其年曰
文章一道作者難選者尤不易夫選不能以受瑕
者也古今作者略可數矣柳吳興隴首之餘寧無
累句薛司隸空梁以外詎乏蕪篇而片語纔妍便
登才調全文或爽無損風騷若夫選者之難一篇
失入遂貽四部之羞一藝微乖有減連城之價不
爾則何以華林七略文苑英華諸書至今作此寂

寂而昭明一選千古獨推明允也今茲措撰庶幾
無負歟旣復泫然臨文而歎集中所載皆先後之
率也曩者過江耆舊東晉流人莫愁桃葉之間余
與其年府君定生實預斯游焉今其年與兩兒宣
述石城之勝事揄揚吳會之英流秋菊春蘭芳華
不亞而余則旣將老也覽茲集也撫今思昔樂在
哀來余又將焚君苗之硯而刺賀拔之舌也已

壽陳太公八十序

江南有隱君子曰婁東陳先生云先生字確菴崇禎壬午孝廉也以故數年來高蹈不出文章理學天下翕然從之歲庚子陳大公溫如先生稱八十矣先生爲人長者性醇謹有王彥方萬石君家風然生平知大義負節槩不屑爲世俗態確菴大節得之太公庭訓居多確菴壬午之舉與鄉也實出余郡司李佐平湯公門而余是年亦中副車確菴不鄙余篤年誼又江左諸君子與下走咸修縞紵

確菴尤稱莫逆交今太公之八十也謀所以壽之
蓋余見今之所以壽其親者矣好勞而惡逸樂富
貴而憂貧賤天下豈有異人之情哉以壽吾親者
之欲富貴吾親也而遂有此梯榮寵彼競聲華甚
者乾沒如潘岳猶謬託于板輿以事親矣而確菴
不然以壽吾親者之欲逸吾親也而乘堅刺齒肥
樂甚貴適意耳確菴又不然吾聞確菴居蔚村蔚
村婁之僻處土田磽确民俗愿樸其男子善耕種
數百年無些賦家確菴奉太公數徙而至蔚村焉

先是確菴一再徙無之乎非蔚村也確菴自田間
來田間人絕不知爲孝廉也太公年八十又健飯
且日率家督利其錢鎛而耕之慰勞焉暇則入鄉
塾訓章句與人子言依於孝與人弟言依於弟勞
苦不少休於人無所枝梧蓋鄉人初不知爲陳太
公父子旣未嘗不樂有陳太公父子也確菴之壽
其親如此富貴乎貧賤乎勞乎逸乎衆人惑之冒
子信焉於是呼禾丹兩兒而進之曰夫陳太公者
知大義好節槩者也陳先生者高蹈不出文章理

學爲天下師者也陳先生之壽其親蓋以貧賤而不以富貴以勞而不以逸也人以此壽其親吾亦以此壽人之親朋友之誼也亦猶行古之道也且庸見夫貧賤之非富貴而勞者之非逸乎哉確菴行誼旣見于天下余亦杜聲息影不敢稍有跌墜確菴太公年八十余母馬太恭人亦以去年稱七十確菴數子英俊余亦有弄文筆子二焉今余之壽太公者又卽確菴之所以壽太公也太公其肯爲我輟然進一觴乎書以爲太公八十壽序

原缺

漁洋山人詩集序

詩有六義曰風曰雅曰頌曰比曰賦曰興所由來
尚矣輓近以來政教散失禮樂頽壞明堂清廟之
上靡所宣述且也言之者獲罪聞之者不足以戒
於是一二明哲之士不敢有所賦比以自干懟激
然則雅頌之失所也意者風猶可爲乎賦與比之
不復作也其猶或出於興乎四五十年間箋註訓
疏寢以舛譌小夫謫儒騁其師說豈獨州鳩師曠
之難其人卽杜夔荀勗之流亦夏然邈矣黍離麥

秀識者以爲於詩兆之其後吾友華亭陳黃門起而更張焉毛鄭功臣於斯爲烈乃後之學步華亭者得其鉛澤而或遺其倩盼乍離乍合載陰載陽徒令人睠哲匠而躊躇慮知音之綿邈也抑詩學誠難哉不意當吾世而得阮亭王先生先生神靈夙授騷雅性成兼之酷嗜披覽於古人微言別有領會生平著述淵富才思敏贍踰於四部溢於七略紀年一編斷自丙申爲始大約申酉之間先生之詩其裁製宏以鉅其體格壯以烈高文典冊

商皇皇意者般匪之構建章牙涓之鼓鐘簴乎戊
亥兩年其標旨也微而遠其托物也思而多風明
秀嫵媚傾城絕世詩云有美一人清揚婉兮阮亭
之謂矣庚子辛丑則如成連之寂寞郢人之運斤
成風意到筆隨神行官止擬之李杜王孟高岑間
未知置身何等阮亭其猶龍乎善乎陽羨陳生之
言曰吳興隴首之篇康樂池塘之句非關詩史並
係直尋夫仲默昌穀洵風流之絕調也然舍人述
作終傷繁富廸功文筆微嫌婉弱必若漁洋通何

徐之驛騎標文質之淵源庶幾三百年一人耳余
沐浴斯言深相撫掌但因老大未能深造惟令兩
兒子禾書丹書日夕讀漁洋詩一帙以當師資而
已

王自牧集杜詩序

蕭山王自牧夙負逸才好著述風義稜稜直逼古人余久佩其人且誦其詩大率一軌物於少陵云乙巳丙午余咸以新秋艤舟邗江屢晤自牧復見示遊園汎舟詩如千首蓋集杜也美哉洋洋乎其正始之遺風乎夫少陵以曠代之才蒐剔古今牢籠百態揚風扞雅觸事興賦比物陳譎沉鬱頓挫化工肆給殆千百年一人耳而自牧輒能攬其微旨會其全神含英茹華而集其句我取古人之心

而謀之若古人先取我心而代謀之我取古人之
心而合治之若古人先我心而分治之故少陵之
詩有不端于時會者而可以銷夏思秋遇也有不
端于遊眺者而可以名園曲水通也有不端于招
尋者而可以勝友嘉會求也且歡樂之詞而可以
感慨會憂患之詞而可以休游詠也讀是詩者謂
爲少陵之詩可謂爲自牧之詩亦可謂爲少陵先
作以待自牧可謂爲自牧繼起以追踪少陵亦無
不可彼夫步趨古人口吟筆寫取瑜雜陳高者刻

畫爲工卑者揃摺爲富以彼較此不大逕庭哉顧
自牧于此亦有家學焉昔其尊公先生凌鑠千古
集杜詩成帙行于世自牧有少陵之才而復集少
陵之詩似續先人其風人中之孝子乎吾家世業
詩先大夫放蕪林泉惟耽吟咏亦有集陶集杜余
更有杜僻自總角及白首手披目誦已竟數十過
但不克如自牧之融洽渾淪範金集翠與先民伍
而所好則同將天下知自牧與余交者以詩而所
謂文章有神交有道者自牧得以尚友杜陵余又

得以締歡自牧矣

稽鴻若詩草序

憶余曩時與臨川諸子遊也與大士文止大力千
子爲文章聲氣之交嗣則吉人晉卿機部巨源茂
先士業爾公會直左之小范小星相與刻燭聯吟
浮杯狂嘯滕王閣上桃葉渡頭有數人者短詠長
歌與江聲相亂蓋至今極不能忘無何數子俱寥
落或在或亡余亦老大足跡不及里門外依稀舊
雨大半山陽又不獨臨川諸子爲然也憮然久之
彌深歎息一日者家大阮以何處草一集授余讀

之見其清文綺句斐疊絡繹古詩則規矩黃初近
體則出入天寶徘徊咀賞不能釋手問作者何人
則臨川稽子鴻若也且稽子遊東臯久生平蕭遠
澹泊絕未嘗求知于世卽以余縑衣夙好僅僅于
黃九烟座上一識其面則其人可知矣獨余老而
才盡茫茫百端每思襲遊逸不可得矧先大父宦
章貢攜余僅二歲郭大司馬青螺鄒總憲南臯兩
先生時著余膝上水厄萬安全家寄寓劉少司空
時吉侯先生尚同先君爲諸生也後先君鄉會出

閣學鄭文恪公侍讀謝培元先生之門余庚午首
場爲姜居之先生擊節以未終場不售先生每與
維斗機部卧子天如言深爲歎悼辛巳余訪先生
與牛峰繇袁入南嶽臨侯先生方以危疆受過被
逮然足跡半豫章矣今讀何處草追憶先後師友
中郎虎賁感舊之情正深而傷今之摧抑者復豫
章故人也若夫竹林風調叔夜爲先則君詩學淵
流自在天壤又無俟鄙人贅言矣

壽湯惕菴先生暨太公同歲六十八十序

嘗讀古今傳紀於遺民耆舊輒嚮往者久之漢之
四皓尚矣次則唐九老又次則宋洛社耆英固未
易數數邁也然猶曰此非一家之人至東漢疏廣
叔侄北魏楊椿兄弟或以隱節或以耆年聚于一
家矣然猶曰此一家之人而非父子同時之人
至于一家之人又爲父子同時之人以德若彼以
年若此此卽古今人不相見猶爲之流連焉思慕
焉徘徊而不自已焉而况乎我所親見之人我所

親見之人而以德若彼以年若此其人而疎我者
焉我猶流連思慕于是人也其人而遠我者焉我
猶徘徊而不自已于是人也而况乎知我之人其
人而知我矣而或十年而一相見焉尚不能無歉
於余心也或千里而不能卽相見焉尚不能有慰
於余心也而况乎數十年數千里不克見之人有
其人焉而余何以爲情也有其人焉而余又何以
無言也則余惕菴湯先生喬梓是已蓋先生今年
正六十而太公先生復八十云先是歲庚子余犬

馬齒方五十先生爲文以貺之退而自思夫以成
我知我之人且數十年數千里不克見之人今又
走書相告焉余又何以無言也雖然余又何言將
言先生之樂道安貧著書窮理與太公先生之神
明矍鑠意氣疆健以爲嘏詞乎此則何待余言也
將言先生之履險蹈危遺榮棄世喬梓偕隱其蕭
然自晦之故乎此又先生之不欲深言也無已而
言疇昔之事憶昔先生以司李起家吾郡廣陵之
人士與江南之名宿無不出其門然先生尤深知

余先生爲政四年茹藥飲冰鋤疆扶弱鯁介特立
卽當世要人罕有爲屈意者顧獨折節下余憶先
生甫下車卽按部吾邑式廬密語曰闔郡利弊無
小大將惟子是諮子無隱時余以諸生不與一切
辭又辭何以知余之無私于一切而悉諮以利弊
也先生曰吾未見子知子名旣見子知子心時江
南北大飢吾邑尤甚斗米千錢首以發賑請先生
立請之史制臺黃道臺大發金錢不檄邑令不入
銷算惟余力是視余破產佐之得活數十萬衆此

先生隨車之澤也他不悉記猶憶一日午夜急召
入署詢一諸生大辟余謂此人以不檢褻其衿恐
海內猶有惜才之歎置之辟則傷夫子明然是人
誕妄母謂余申救也先生矍然翌旦立爲昭雪後
倪鴻寶張二無楊機部諸先生及維斗次尾輩無
不頌其冤其人後旋驟獵督撫終罹難去臯四十
里海安鎮有壩名牙橋此張士誠走險地又三州
邑十鹽塲血脉寄命乃奸竈以蜚語中史督臺聽
督臺檄先生躬馳其地立毀之先生以急騎召余

至海陵謂是非子不能挽也余夜達邗朝謁史公
娓娓數百言史公立寢其行且傾心余言無異先
生也壬午冬先大夫監寧南軍自襄樊歸先生過
訪酒中頗有密稟亟詢之乃知一諸生被盜反爲
盜誣發左右夜擒之余具言始末力持不可先大
夫時驚起謂余何得無譚若此乃先生反避席相
謝止言幾爲海陵守所誤斃盜而還其子衿又邑
令貪酷一衿逢其怒申置不測偶于韓黃門舟中
遇先生言之乃出柙學稟于袖中咸撻父窩盜諸

款也先生卽爲解免且薦之應試諸如科歲兩考
薦拔生童不以時不以數學使者咸如先生言先
生咸如余言孤寒振拔名士彙征彼時日有以千
百金相餉者余咸歛避而唾絕之其事安能縷述
也壬午分較南闈是科多私獵者先生所拔皆確
菴一流人獨余悞置乙榜無憾也旋史霍兩臺以
特疏薦宗學臺以入雍薦何莫非先生以文章經
濟交譽乎然余彼時亦何敢少負先生也卽先生
亦深知余之無負于先生也今雖數十年數千里

不克見余也躬耕養母忍辱忿怨損棄萬有其不
敢負先生者如故然則余今日又何以告先生乎
亦言其始終無負于先生者而已先生聞余之始
終不敢負先生并太公先生而亦聞余之始終不
敢負先生也而先生與太公先生其亦各轅然盡
一觴焉已乎卽以此壽吾先生暨太公先生焉其
可乎是爲序丙午端陽日

題水繪菴學詩諸子詩小序

曹子之曾大父慎齋公先君執贊問業尊公公鉉
明府則余數十年風雨聯牀友也慎齋公經明行
修公鉉則以雄文魁兩榜推循卓第一然世不工
詩曹子幼奇伉不羣比鄰世好與兩兒鬪鶉放鴿
行雁驂驪客春共吟新竹限韻詩曹子寂踞一石
有百尺虛中千秋高節之句余爲擊節毋論筆力
矯健品骨底于斯見嗣肆詠登進倜然闐然超夷
等之識負奇驚之才時而空清窈渺雲起松孤杲

兀老蒼峰岫海立卓哉曹子不由教迪不循畦徑
冥悟潛通獨造未有斯豈常節聲詩者歟余欲其
從雅頌漢魏三唐咀嚼英華含蓄意蘊探古人之
奧窔出大手之沉雄鄰下家風何難于直接乎吾
聞英而不雄如鸞鳳自羣雄而不英如虎兕自隊
惟兼總英雄之氣始卓立風雅之林曹子每對余
半日不語屢訂一至此其人殊不可恒視然不觀
其詩不見不沉酣古今畢力于詩亦不見曹子勉
之哉憶乙亥季春朔先君監軍曹濮寄大紅牡丹

數林余與公鉉醉賞抵足夜夢 關帝以兒賜余
枕上驚述公鉉旦爲書之屏因指腹訂婚姻之約
是冬咸得雄回首廿五年公鉉之悲宿草亦十載
曹子四壁蕭然冰霜骨立余愛之而無能益之然
愛之益之之意雖未盡于此而又何加于此哉
張子之詩張子之人也張子之人張子之詩也張
子學詩于余一年每社集或限韻或分韻張子詩
將成余心先喜間有不當余意命之改或代爲之
改張子亦必心喜厭飫暢快而去時愔愔焉觴望

焉此張子之詩所以日益也張子貧甚而品骨愈
堅又絕不露一立品骨意杜門慎獨如在深山茗
椀爐香日與泓穎并精性情嗜好無之非詩此毋
論之詩之人是二是一卽余間居流念三日不見
張子如有所失焉并忘我之爲我矣今選其經歲
詩僅存七首嚴甚五字如山水識奇文七言如三
更人立月華時與今春小三吾分韻之水亭白石
坐幽人恒激揚歎賞吟詠不置勉旃張子余望張
子雖不止于詩然卽詩又何不可以盡張子

顧子少年神清不減衛洗馬其人甘貧力學才藻
如雲出其餘韻種鞠蒔花吮豪啜墨迥出塵壒之
外雖郡邑屢冠軍竟迤邐臺試迄今未廁子衿余
每見里閭踏浪兒充斥頻宮如此秋水爲神玉爲
骨猶採芹却步痛之痛矣久學書學詩于余小楷
臨摹鍾太傅入神絕愛余褚河南蠅頭小楷屢于
燈下一線運腕傳以神韻詩幽秀密麗下筆自是
中晚勝場鏖鹽澹泊又三寶于童蒙寧惟學焉而
不精卽余晨夕揮塵清譚未嘗得與諸子盡致今

文運一洗顧子破壁飛去正屬此時然我輩流風
千古怡悅性情在此不在彼以無益悅有涯是在
顧子解人三復余言耳

慷慨其氣巉峭其品浩瀚其才賁子有焉賁子累
世尚節槩其祖父子然一布衣詣闕陳疏條免邑
中某某事故賁子猶侃侃有祖風家無四壁自顧
泊如而種學績文力崇大雅爲詩氣韻沉雄不屑
纖纖細響或如老鶴盤空或如瘦蛟舞水或析理
談玄颯颯有松風氣且工書運腕適逸簪花屈鐵

仙仙如也賁子賢乎哉顧賁子善貧兀然窮鄉館
穀郡縣試輒冠軍而數屈臺試猶艱一衿激楚悲
憤不得不寄之題咏常攜一囊策一蹇坐我枕煙
亭相對論詩談必飽滿歌舞之餘從以筆墨每成
詩宛轉共商確殆虛心實腹其人歟嘻士窮節見
遇合固有時吾不僅以區區一茂才期子子無僅
以區區一茂才自期并自畫也賁子賢乎哉賁子
勉乎哉

石甥余族甥又甥倩卽李甥妹字之也尊公邇德
余老友兼擅詩文石甥童年穎發年來亦寄我一
枝與兒子輩砥礪切磋共商時藝學詩未嘗竟學
其于帖括則勤敏絕詣向如曉日芙蓉翹英濯秀
近更才氣俊逸如老鶴摩空秋隼孤舉放乎古浩
余特愛之用志不分乃疑于神石甥未肯肆力于
詩良有以也然偶一落筆自見清新今存二首雖
吉光片羽亦足增渭陽氣色耳

聖賢于父子有中不中才不才之歎從來獨稱甥

似舅歷稽何劉王范甯魏謝羊咸著渭陽情誼親
而責亦綦重矣李甥墮地胄毓華叅時余家亦蟬
連華腴兩門並峙以掌珠視之富貴福澤之氣長
養才情感指爲瑤環瑜珥蘭茁其芽又曰雛鳳清
于老鳳然掩閉其才情正白不少十餘年來乃以
池魚屢傾巢卵流浪平流幾厠憑穢近復恒嗟遶
樹始畢力苦吟去春詩尚雜沓西崑體裁稍失余
返之于格拓之以氣而洗滌于清華每集擊鉢先
成一歸醇正然羈孤憔悴之後忠臣孝子之遺如

哀鴻獨叫于苦竹白沙如疾雷破響于荒天宰地
藻肩黼帳之英化爲織絢縹蕭之態幽介賤俘之
况發其擊鐘考鼓之音作者神傷讀之意失余選
其和平數首雖在花月之前終多雪霜之氣三十
年來升沉判若鴻溝匪此窮愁正未易刳心風雅
近奉兩親寄我割宅尊人慢菴古處奇癖浸淫于
詩年來與余倡和最多且妙乃以埋炤不肯輕以
問世而余反得籍此致輟饌燎鬚之意于吾姊是
亦不幸之幸也後來之秀應屬李甥然殊宗代疎

之誼余媿姚崇成此宅相之奇是在元陽一振耳
他日有讀余小三吾倡和詩者曰惟舅與甥渭陽
詩話視古人正不多得矣

巢民文集

雉皋冑襄辟疆著

書

答丁菡生詢回生書

病後屢承手教垂詢真至僕迄今不能仰答關切
足下不訝其疎節過當必致疑危病之未痊也人
之疾病歿生本無奇異僕此番病狀揚說溢實遂
致四方傳悞盛譚鬼神不可測度當僕極病時故
吾確有所往其臥病榻上者口支離而身反側舉

平日所最不快最欲吐者隨遇傾倒竟不知其爲誰以故我所往所見之事不能直述告人人所聞見者此榻上病人之傾倒僕醒後實不能記憶一言且他諸病歿亾之人于僕確有關說尤不可解口無岐舌筆無駢管安能鋪敘此不見不聞與獨知獨覺之事乎病起屢向戚友陳說無人爲僕拈出今敢以得病之原與病中之略爲足下詳述之稍慰千里之心兼白四方之悞僕別後殘臘到門則敝邑哀鴻遍野饑寒之狀不可殫說當事因有

四門設粥百日爲期之舉僕念甲戌辛巳賑粥之役曾隨家大人首倡力行雖今非其時寧忍坐視不量力復爲之家大人賑東門西門饑民爲最且地鄰泰興就賑殊衆僕力肩其難遂就西西之饑民日浮他門以千當年兩番開賑四門併二廠二廠盈二千人歲之霜儉至矣茲四門各開一廠合之日有萬人而西每盈三千西之去僕居遠賤體弱不能朝食每晨空心凌冰衝風偕一二同志友十數僕從詣廠與諸鄉耆嘗粥糜之厚薄量米數

之出入覈饑民之多少稽衆役之勞怠進數千人
於常面魚貫而出窶者瘠者老者幼者與真疾病
者另爲一項各叩其處分信實諸僕隨之以往另
給米錢按旬則以斗米數百文計按日則以半升
數十文計有一人至弼廠家有老幼數人餓且病
不能扶曳出門者有數人餓病于一室而歿生相
半橫陳于赤地者呼號之急形狀之慘氣味之臭
歿亾之怪異必親歷聞見庶施與埋葬歿生實實
沾被尤不忍者幼兒痘疹盈面載風雪裹伏道途

老病人數十里就食而來衝寒勞傷立地倒死卽
有懸絲之息夜無假蔭僵歿更多僕於廠傍築地
以蘆草爲煖室居之夜募行力老僧加粥一餐繼
以薑湯熱水然病者歿者反日衆僧人亦觸穢咸
歿蓋在時散填溝壑茲則聚于一隅仲春聞南門
賑不得力僕復之南二月廿八日于南門散米值
大風雨頭目岑岑家大人及諸友皆戒僕當少謝
事且毋早犯霜雪觸穢氣斷非弱質所宜僕歷舉
古之厲疫不能相染相答兼開諭日隨諸僕謂同

是此人同是此血肉我輩飽煖何忍見其饑寒又見其饑寒頃刻而歿我不惜此身救人之饑寒救人饑寒之歿豈我之身反有歿理且賑粥之初在厰覈米過察爲人所辱不堪復隱忍爲此亦以人命爲重忍辱事小耳諸僕聞此咸手口瘖瘁不言勞且尋問病餓人至數里十里外三月初疫病大作城內外尸相枕籍時當事去淮僕於三月朔復以長兒行聘二百金盡易錢四日一周日走一門日以二萬錢散極貧極病者於是三四貧病人交

聚于僕所到之一門雖體中積勞增病不遑恤也
直至三月十七日僕一病便憤不可支吾蓋前此
三月餘日與二三千人俱按日計數與穢病之矣
晨夕哭泣告訴相對踰二十餘萬此二十餘萬人
饑寒疫厲之氣皆吞吐于我之心口間旣以空心
受諸惡味又日枵腹至午後始歸每至溢食饑飽
不均脾弱難化安得不病安得一病不憤而醫者
不驅被風邪內消積滯一味矣投參耆遂致終日
抱火而臥不醒人事然偶一少醒但見數千饑民

攀衣呼泣索食索錢而已廿二夜忽見偉丈夫自
稱山東人來與僕遊詢何往則云天上有天宮絢
爛可觀隨之冉冉上但見宮闕崔巍樓臺觀閣環
抱繚繞簷楹四五層并闔迴綺疎皆純是黃金雕
鏤築造中間點飾翡翠赤日黃金光芒四射雙日
欲掩余笑曰吾聞三十三天中央城曰善見純金
所成用百一雜寶嚴飾豈卽此處耶其人云此處
可遊不可飲與子渡大海登蓬萊頃刻涉海至一
山山島竦峙林木花草迥秀飲食器具不是人間

經見卽杯斚數進非玉非犀難以名狀但識玻璃
一種而已將別詢其人寓何處答云我日與子游
天宮蓬萊之上夜卽宿子之心他無所往他無所
住僕甚怪其言廿三早稍醒數以告人午後忽我
臥室移蕩湖海中隨波上下天雨金如瀉如此兩
日至廿六蚤復醒時僕面牀裏啓眼見有朝衣朝
冠執象板者兩列嚮余鞠躬凡二十餘輩其人面
如傅粉皆神仙中人余內訝不可解引頸觀其下
尚有面色稍黑鼻眼凸凹者口上豎長鬚二根至

其杪殊多屈曲然衣冠象板咸如前二十輩久之
益恭僕詢云諸公何事以非禮加我答云有所藉
重但求俞允僕曰我牀裏有板牀外有壁諸公從
何入余從何出衆云但求明公見諾自有出路僕
云試明言之余當偕往衆云後山苦旱無人行雨
我輩羣來虔請耳僕私訝李衛公有此奇且諸人
以隆禮相加必有殊異遂許之許之聲始出牀後
墻門洞開四十餘輩人戴僕於首騰空直去靈靈
覆覆至一最高峰峰巔僅容坐僕一身其四十餘

輩不知何以峻立復羣侍左右凝神一望見所坐
一峰天嶺交氣俯視萬山如兒孫揖向絕無房屋
草木人跡僕云行雨之具爲何諸人云明公但直
伸兩手舒其掌我輩自有物隨公掌而下試爲之
見山腰冰雹夾大雨如拳如瀑四垂頃刻萬山盡
騰雲霧余手不停者兩日夜至廿七晚始竣事諸
人復以首戴僕歸歸途見海鬼如魚蝦無數咸以
大筐抬極大金銀爲餽余笑指此物非余好也一
毫不受諸人云我固知明公之無需此然不妨存

積是處耳發數百筐平地高七八尺如小山衆遂去至廿八午後余口中喃喃言歸矣又云遇赦而返此番真醒始知余身之載病前此微醒不知我病卽家人環向而泣亦不知余數日中曾微醒也審視詳詢衣衾燦然棺杉畢具兩尊人及弟婦兒子輩抱頭觸腦而哭者不知幾十番至戚好友羣聚牀頭議方灌藥祈天籲神咸不分晝夜與庸醫紛爭角舌束手夜遁光景不可狀最異者弟魂去行雨兩日此身偃仰一榻憤憤宜爾乃遇

親友相見必發其胸中所欲抒積抱鬱壹無不吐
露然後及他亂語家大人執手垂涕僕朗聲云兒
行不顛倒坐不錯亂父奈何自苦以苦我在傍者
云此二句出佛經僕生平不閱經典也又云我身
傍另有一身但不能合而爲一家大人因抱僕同
卧僕云我兩身不能合卽如父與我合在一處實
兩身耳又高呼關帝君弟子虔奉尊神三十年生
平自審無過惟神知我望來相救此種種牀上言
果是何人果是何從得來乎廿七夜唇焦齒黑舌

如墨縮却不成言氣吐不復納斷無生理家人已
爲着衣就木忽然度曲音律悉諧手自按拍不失
米黍親知環聽皆謂咄咄怪事又索筆題詩邀人
開窗玩月向僕婦索筭中金盡散諸戚友自鳴豪
邁家人破涕爲笑此果真我乎抑第二我乎至廿
八日家大人素敬竈神揮淚爲文一告竈神一告
城隍之神浙友桂子發因言申文定公夫人垂危
醫藥俱廢有導其請長吳兩令申文城隍得回生
者况僕之疾繇于賑饑以活人而自斃或亦神之

所矜可做而行也家大人雖惡欲生其子而未敢
請不謂令公得于傳聞作一文述僕數月救饑之
勞施與之衆謂天果不絕善人果欲留爲善之人
以勸人之爲善斷不應絕此人之生卽陽數已盡
仍祈增紀延筭等語遂至城隍前禮拜焚牒而僕
之喃喃言遇赦而返者偶在其後人遂謂有所感
召而然遠近喧傳說神說鬼僕則何曾去地府何
曾見城隍亦何嘗知之歟而生乎其差可異者
則以同時里中患疫將歿者往往先云牌上見僕

名又有南街宣化門開紙扎店姓張者至僕門問云爾家主人有病乎家人答曰然張云吾弟亦患此症昨夜忽云親見冥司勾攝一牌凡五十餘人而我與冒辟疆錢敬谷許一水之名在焉家大人聞此驚怖欲絕備偵錢許果皆沉病次日錢與張相繼歿許亦旋歿許歿時亦云冒辟疆同我作詩且張數云冒辟疆已坐我旁約偕往我不能避而僕獨免于歿則固有不可究竟者又同時去縣百三十里掘港場管姓人病中見城隍廟門外懸一

牌硃筆標寫冒襄准保仍着用心爲善石舍親之
僕年二十許甚壯見城隍云冒襄家多病人爾應
日運水十担送其家令病者飲之迨晨具言以告
人遂卒而寒家賑粥諸僕雖值僕病憤相率捱戶
散錢不倦咸危病瀕歿而生以此人益奇之喧騰
變幻僕實一無所知且見也廿八後腹如橋梁有
物墳起蓋積滯以誤補堅據于內口渴不可忍日
索數十百梨及甘蔗荸薺之類不以時不以數進
至清和朔後大便每日下數十結塊凡十餘日約

去數百塊遂霍然霍然後家常晏語細述僕前此不能生不可生無法可救之狀并及僕榻上向人之形色語言兩尊人弟婦兒子及戚友更番舉說莫不涕且笑笑復涕痛定思痛他猶可解苦累老親幾至不有其生不慎之罪無所逃已家大人又語僕云令公焚文顧神之日吾先赴城隍廟俟之坐一皮姓道士房忽有穿孝服者闖入此人復羣坐吃齋不卽去彼時殊疑非吉兆也僕忽慄然曰兒彼時亦在侍蓋自行雨後便隨家大人赴廟至

月臺下轉西廊入道士室凡在坐者一一記識又與帶孝人比肩坐食二麵饅始散步歸旣不謁神別無所見亦不知入廟爲何事與家大人所言無不脗合此又何爲也總之人到極病時魂升于上隨氣所之此塊然偃卧者熱極則憤憤極則亂凡生平有所怖有所負有所害有所瞻顧不肯露至此如火迸發毫不可飾僕數十年來門以內實有職業而推物及人往往不遺餘力至筆墨花月聲音諸逸事頗用精神故垂歿時心之所發卽此數

者設高歌而歿亦大快事僕之歿生如此而已其
他病歿之人說僕當歿當與之偕歿乃彼俱歿而
僕獨生其可解不可解乎足下來教云僕有太受
用處宜省微足下言人亦言之僕少年不自揣度
妄謂此生鐘鼎之奉應屬分內故視一切甚易甚
渺乙酉以後家幾破而復存身既歿而復活更捐
棄一切爲身外物外然此中介然凜然不可告人
人亦不知惟至患難疾病歿生時每僥倖得過或
亦其微效也從今以往亦何敢有所增減有生之

年仍行吾素而已據案率書錯雜多不成語惟台
覽後爲之改削付梓以傳可免第逢人一番陳說
也

答李廷尉書

客臘使羣到門正僕慕叫擗標時兼以海警震鄰
大兵臨邑疾驅寢處苦塊之子以衽金革又薄俗
信信乘亂搆戮僕毀瘠一身技血吮毫不知何語
徂春入夏倏閱半年悼音容之日杳撫手澤以如
新小季伶仃老母顛顛天親既缺人險復嬰二百
日來人徒見其形瘁耳卽老妻弱子相向汎瀾亦
曾莫悉其痛乃至此也近忽一病幾復三歿蓋無
異于乙酉之鹽官罹難暨壬辰之破產賑饑時卽

今胸臆結轡有物如拳者數四上下衝激吐汗瀉
咸不得銷而肌理則已全削蓋積勞積鬱積痛蟠
亘于中豈虛福所能愈哉世態交情歟生頓異眼
前之人不惟素車白馬杳若晨星卽數行弔唁不
能得之年譜至戚獨閣下流寓玉山越江遣奠旣
頒厚賻復荷隆情疊幅盈縑跼儀牀之側覺有
血濡縷化爲虬螭蜿蜒連蜷于靈旗上下者嗟乎
當世誰復如閣下乃僕父子又何以得此于閣下
哉先府君一生伉直萬事寡緣五載皇華三啣土

命壬申考選已定西臺捷足者夜半易爲南部南
考功例署內計旋轉清卿甲戌夏先君纔陞正郎
一揮出爲兗西僉憲蓋先是冢宰疏謫心許之選
郎臧掌功司計典而先君清率之路遂兩絕矣乙
亥豫賊窺河先君與曹縣化鳩之大帥寢食黃流
北岸者一年兩目風沙終身痼疾卽先祖長逝不
獲躬侍歛含然而青齊忼慨之夫曹濮風塵之客
自備芻糧不願上簿不願作官思効歿于先君者
日數千人以故數十萬曠賊未嘗一騎渡河于是

兩臺特疏敘功請加一級乃迄不奉俞旨而同時
爲兗東東兗者或安坐而遷方伯中丞繼丁內外
艱臺省如葛介龕范大來兩年伯交章特疏以邊
才薦雖奉特旨然皆爲捷足獵升者地服闋身未
到部同鄉副憲徐蓼莪年伯恆勞臣之勞力請筦
銓調補東粵先君甫蒞粵而特揭發賄賂者再制
臺據揭題叅一將一令爰舉卓異然異已者實深
疾之半載調衡永又半載調獻賊屠破之襄陽維
時辛巳五月僕往返萬里覲兩親于南嶽先君執

襄手以老母相付曰余之不植黨不通津要之效
乃至此哉然裹革疆場臣事也汝速奉母歸母與
吾事遂單騎疾發抵襄樊斯時也事急矣諸臣凡
陞補襄樊者咸逡巡後至而先君獨單騎縱橫奔
走于瓦礫之間加之督師狼狽左帥縱橫闖獻飛
騁于鄖竹降賊窺伺于肘腋撫治旣不同心守令
尤多貪墨惟有司李朱拙修傾心置腹相倚若左
右手然兩人環顧內外無一可恃噫亦危矣哉僕
奉母歸謬以十年來文章聲氣在海內違先君命

大聲疾呼上書當事求通閭閻卽與先君最相柄
鑒如貴邑相國同容相搯如上江中丞皆爲僕心
動而同鄉之孫黃門顏吏部成侍御實左右焉維
持轉徙幾歷一載仍調先君于寶慶時全楚惟寶
慶稱稍安先君聞命下不知所出卽以餘生乞歸
歸未兩月而襄陽復破矣嗟乎豈非天哉然自充
西迄請告五調未晉一階癸未大計內無冊外無
單反以東粵發賄事浮躁降原舉卓異監司四級
甲申補漕儲旋丁崩拆先君通籍十五年艱危宦

績盡是矣鹽官避難全家瀕歿雖俯仰得脫鋒刃
而家人被殺掠者二十餘口故園池魚委署官矣
加藉沒幾不能復保廬墓近雖數載株守三世瓦
全僕奉先君子門內鐫戶闥影無異枯僧先君皈
誠梵唄刳心風雅永日擊鉢午夜挑燈于經史詩
咸有著述人見其老而嗜學如此不知藉以戢風
波乾詬墜茹荼蘼咸是物也六十五老人岸立強
飯毋拂意之甚繞屋而走骨節錚錚然間說前朝
身歷殘疆與國家掌故絮絮竟日夜慨然久之然

精神視僕可三四倍竝曠往來與閣下揚摧古今
外惟崇川范月卿先生德州盧德水侍御梁谿高
彙旃學憲數公他無復有一字相念者痛哉痛哉
壬辰春僕魂遊天宮海島間如裨史所紀李衛公
行雨者三日身在人間無復生氣先君痛哭旁皇
衣絞棺杉一一預備後得庚生乃藏別室豈意去
冬一病竟留此爲先君周身殯殮之具也痛哉痛
哉不孝歟先君救之以生乃不孝生不能救先君
之歟又不克相從以歟也不孝尚得自廁于人類

哉中夜迴環稍足以仰酬先志者幼而力學夙聞
海內長而著述謬傳四方雖六闈屢中副車而一
命未曾捧檄今狗馬之齒四十餘已從先君後歌
白石者十一年矣此十一年中烏師批頰蟲學叩
頭忍辱摧心無所不歷目前慈母幼弟擔無可弛
但恐僕本恨人復嬰沈痼一旦溘先朝露海陬孤
生誰復見憶并兩世先人本末亦湮滅誰稱道之
者用是危懼益甚茲幸閣下人倫淵鏡史學干城
獨行遺民咸蒙搜採近者台諭下宜欲爲衰門表

章三世鏤心刻骨南向主臣念先君昔爲疆場扞
禦之孤臣今爲憔悴羈孤之遺老著述具在不愧
完人至先祖爲守令十載不名一錢真可列神廟
年間循良第一癸丑令虔五年辛酉補蜀鄆都令
適值奢酋之難孤身抗守與石砭女將秦良玉協
力殺賊卒保名城亦以不餽內召同官金其人進
掌兵垣獨咀敘賚當年同討賊州倅皆以聲援由
監軍晉同卿而先祖僅遷一州竟拂衣歸矣生平
著述有兵餘集渝變略皆蜀中詩史今入得全堂

集中猶憶僕十餘歲時從官蜀道鄴都震鄰先祖
立遣家累還先祖母裂帛繫印于先祖肘後僅以
二僕從一痛而別千里江陵嗣後先祖寄先君詩
有爾自好爲吾不惡登陴入社又開尊之句蓋當
是時先祖上馬殺賊及磨盾鼻草檄書外卽與部
下士南樓嘯詠不少輟云及戊辰先君登第詩則
曰明朝仍對山僧奕一任傍觀笑老狂蓋捷騎至
時先祖方與僧奕于藥室奕罷始歸其生平曠懷
落落大率類此當時爲文以揚祖德者則有泰和

郭大司馬京山李宗伯雲間董文敏諸公墓表則
出倪文正公手蹟昨承來訊懇篤周詳故敢述兩
世家乘副之記室惟閣下實裁擇焉

與曾庭聞書

襄甫二歲時先祖令貴鄉會昌隨署五載泰和郭
大司馬吉水鄒總憲南昌萬儀部同第太學與先
祖以文章道誼相勗循卓相許郭公過九洲置襄
于滕先祖于會昌江上造抑洪橋郭公以襄名命
弟蓋媿其功于萬安也先君往來侍養與寄菴右
君吉侯晉卿二傅二劉先生篤貧賤交皆萬曆丁
巳前事也戊午先君舉于鄉總裁爲上饒鄭文恪
公公車三上得遍交貴鄉諸大君子戊辰又出南

昌侍讀培元謝公本房庚午之役襄頭二場已爲
姜居之先生擊賞三場厄于病貴鄉詹大京兆侍
御橋梓十餘年爲襄歎息此維斗大樽機部沾沾
相引不遺也辛巳省覲道經貴里同士業過牛峰
訪姜先生巨源入西山訪李先生風阻章江與士
業巨源左之曾直小星稱詩論文于滕王閣上千
子爲先君重訂全稿并選荒文于文待正此時耳
入臨江機部下欄道袁與爾公叔子盤桓恨不得
見臨侯先生先生正以撫治臨鄖陽袁先生梅公

李先生同先君官使署在都奉教尊大人先生久
且洽先君歸里稱述尊大人正色立朝清峻持已
其于國家典故人才經濟兵戎財賦無不講究仔
肩言之齒頰間皆疑冰雪裹成童入名場二十後
剝落浮華頗研經術其于橋梓拈一瓣香已三十
餘年滄桑後歷盡流離患難又兩歿兩庚生焦先
之瓜牛可廬袁閼之土室爲母絕名鏤戶不獲于
庭間相遇中原一譚疇昔然貴鄉襄之并州也貴
鄉諸先達同志襄祖孫父子三世骨肉師友之交

也襄數年來縱客散家落爲里中受恩所嗜噬語
許毀辱不可言狀然每遇貴鄉人輒多依戀到邗
怡直峻度歸道大駕在吳懇求其古今大業獲展
誦施邇大刻靜對一日夕無論開天鉅麗規摹漢
魏三唐而以少陵爲堅壘讀牧齋雪堂兩先生及
我友采臣三序知流離邇播已極所遭而又緣此
伸志獲遇嗟乎庭聞其遇奇其志良苦矣庭聞歷
盡秦晉燕趙齊梁吳楚之區曾遇二十年前素心
古道諸友一詢衰賤姓名者否若二十年以後人

聞人說襄輩不爲不知其人且多訕笑今庭聞在
英襄安得起文姚陳徐諸先生與吾友維斗吉士
拙生草臣神清聖野雲子于地下一披襄生平梗
槩乎言之熱淚十行並下矣目前見存者梅村祭
酒歲必以五六扎通而顧松交吏部諸六在太守
知遇殊甚他處不必齒及賤名先祖昔以選士入
太學受知晉江李文節德清蒲州三相國蒲州以
泰州爲并州卽先君初上公車猶在門牆近何敢
漫及舊事因次兒在都依栢鄉合肥兩公昨寄合

肥與襄晉謁撫公書最切擬遣大小兒來又牽于
鼓盆之痛且受無風之波不能前敢告知已爲我
致意敝郡熱腸爲友僅交峻度試向峻度一訊襄
屢歲苦况并吳中客歲惡禿始末當爲指髮摧心
襄不敢以交淺視庭聞者正恃貴鄉爲并州及當
年三世師友之誼且先君曩侍尊大人教愛我兩
人豈可比泛泛交游者哉舊集具在少作久應焚
棄日記諸詩迄今汙紙正不忍忘此山川友朋耳
并今文選近刻呈教引領金闥目斷神往

上甯離臺書

恭惟老祖臺聖代人龍熙朝鴻寶巍科綺歲騰輝
冀北燦奎垣金馬銅龍兼領殿中冠獬豸執象簡
而入直臺閣生風對仙仗以彈文貴游懾氣爰借
埋輪之節出巡煮海之邦薄海內共仰斗山大江
南獨披福曜凡有血氣咸思沐浴于崇隆曾厠詩
書敢後薰陶于大冶特以衰殘久廢如斷木之棄
溝茶苦自甘譬冰蟲之食蓼于申酉極患難之至
當壬辰幸庚生之奇以此閉戶竟已廿年况有老

母將開八袞不謂久瞻日月攀附末由近戴高深
感通無自竟蒙齒芬下問念切編氓臆記不遺傳
聞父母知中壘之說項情深故人感二天之被蘇
誼超千古聞之私喜敢不馳趨茲來恭謁憲府滿
擬卽叩門墻未遂樞示先蒙寵召欣承解凍之風
願作隨陽之鳥忽驚聞太母大變老祖臺摧傷苑
結不克上慰至情徘徊躑躅之時又拜溢格隆腆
之賜撫躬不安愧浮于感念治襄童年以詩文受
知董思白陳睂公范質公倪鴻寶王覺斯諸先生

明季二十年謬厠文壇之末虛盜海內之聲屢中
副車堅辭辟薦改革初隨先憲副投閒久安耕鑿
國初如按臺姜公指名薦舉嗣制臺蔡公總漕淮
上撫軍林公開府海陵咸垂注下交襄惟杜門守
分後巡海按部不登憲院駐節荒園式廬之後繼
以旌門猶憶水檻片席侍蔡林兩公小坐而提督
楊少保亦過訪相與流連永日下邑至今倭爲美
譚卽今小兒在都蔡公與栢鄉相國合肥司馬推
解卯翼有加無已蓋亦追溯當日之微名尤憐晚

歲之循分豈意百忍持身三反自信直道難容欲
傾庾袞人情叵測競疾邴原昨臘媳亡忽興虛訟
雖冤親 氏貪橫駕辭實惡 大奸憑凌唆使前
李父母已代稟抑情近俞公祖亦確知虛罔更求
老祖臺念寒門祖孫父子三世百年未諳雀角婉
示軍廳力爲昭雪海鹽張螺老治襄貧賤患難交
藥有扎特命持謁確守未投昨亦上致矣妄恃恩
遇冒昧傾心日內欲去吳門一叩撫軍方伯兩上
臺久有先容茲緣傷弓遂作干謁亦萬不得已之

苦情也不識榮戟之下仍得一見以展別私否顛
越瞻仰上書待命伏惟明示不宣

俞龔芝麓先生

客冬小人有母已拜百朋九錫之章中間敘述十年交集百感誠知已骨肉之殊情實日月光華之鉅麗登之屏錦眞足爲寒家世世之大赤天球更使衡門菽水無以自將之子得藉手天上故人奉獻一觴於八十老母感深舉室慶溢千春自謂陳人何當心注乃犬馬之辰不遠數月穗兒不揣又復相聞值禮闈春榜之時膺四海文章之任更重煩枉駕能仁飛觴倚馬追往溯舊迴環二十年情

事奔赴絡繹纖悉罔遺傾倒平生之言爛熳雲霞
之錦敦彝不足以名其重華袞不足以喻其榮名
花傾國不足以形其香麗光珠瑞玉不足以比其
澤媚山輝中間和盤肝膽包絡血心世外盟言揮
洒清泪寧惟難以告人正恐索解人不易得耳小
奴楊枝三月望前抵寒舍正與諸爰小集急燒銀
蠟快誦數十過眞覺當年名士清流珠槃玉勒與
朱雀清溪之桃笙象管二十四橋之擊鉢聯床一
一從龍跳虎臥之筆端寫出誠如垂露在手清風

入懷數年來金盡客散繼以無端反噬深悔從前
驚此虛名嬰茲實禍今反覆大文如見古人重開
生面又不覺四十餘年名譽交遊積習嶽嶽動搖
於五中文章之移人性情動人感激一至於此從
此翻悔爲喜破涕爲笑中心快慰昌黎所云雖日
受千金之賜一歲九遷難以喻也晨夕吟哦於鶯
谿十丈之傍又壽之梨棗時朗誦微吟與一二歲
寒老叟共之蓋心許素交無忘息壤知先生正復
同此深情耳豚子因衰門不支兀坐都門以冀一

遇重慶倚閣抑情不歸此中荼苦非可言述亦難以告人幸蒙拖翼百凡垂綆知不待言但一門四世日就淩夷不可思議話唾之到門及面誣穢之違禁日新仍此數人技倆不竭先生呼楊枝詢之當爲一歎亦安能爲此頹弱敝幽之人回一陽于剝極之餘也遠拜鐫觴種種殊異量不勝飲日淺斟在手輒已陶然心醉矣無以報瓊惟深慚感

又

不肖少驚虛名老難入道數年以來金盡客散貧

賤受恩之人皆背義反噬於廉翟之門卽門以內
生平亦備極敦勉而不能少補于孝弟二字早夜
痛心莫能自解先生何取于此衰遲缺陷之人而
教之愛之屢錫大文與以不朽兩小兒豚犬耳少
承祖父之訓讀書尙多不能稍有豎立南北六七
棘闢見擯卽平等一階亦蹭蹬出人意外先生更
何取此蹉跎不材之人而教之愛之踰其父視如
子經年屢歲旣不難以全力注之稍不如意寧爲
不加厭倦而引爲已過一刻不能自安月初拜接

手教再四展讀感歎淋漓先生處禮嚴百辟之上而又爲天下造命萬彙俱待生成獨眞至關切此窮陬踈節泣臥牛衣之老生每自思維綢繆得之夙因鄧結矢之來世不敢置一感謝之辭并不敢更爲小兒再進一叮嚀之語矣三十年前受享太過二十年來退讓太過所以無端不測之事重見疊至七月間丹兒病婦又藥裏一年亾矣傷心切骨其何以堪然義命自諳不敢怨尤惟望穗兒速歸以日爲歲昨忽承大命重索悼亾小刻豈二十

年黃土朱顏先生仍記憶不忘乎昨遍覓得此本
寄上展之如風蒲獵獵中疇昔癡腸重爲輪轉知
必有以生泉下之光不肯令梅村先生香艷十詩
獨擅影梅也庚戌菊月二十日拜手具復

又

去秋小扎奉復後屢接家郵惟感述生成有加無
已然戴忌高而履忌厚先生不以報倦而稍已無
厭之施正恐黃雀一環亦復無能爲報也獻歲三
日正夙疾陡發足痛欲僵小奚忽衝雪到門捧誦

手教并讀大章賜送穗兒移居張螺老十二斷句
貫珠聯璧之瑰麗披肝瀝胆之傾瀉譜年道故之
深情萬顆千絲輝圓錯綉反覆讀之不自知潦倒
卑墳何以夙因中荷綢繆繾綣於門墻竟如此日
異月新也伏枕呻吟步韻奉和又次和周老共成
二十四首書筵求教并繕寫于歲寒倡和小冊中
統祈批閱題數語於首簡擬欲付梓此屢歲懺綺
焚硯後才盡之言然其中情見乎辭頗瀝胷臆先
生知我近況最真幸爲一吐舞劍拔山之鬱勃吹

簫擊筑之悲涼使鄙昧之子知襄雖齒衰金盞見
棄於炎冷輕佻之薄夫而天壤間尙有加殊知異
數於夏冰老鐵如先生者亦足令此輩意沮也豚
子困守長安不過羞爲親族擲揄此若無成不知
所極襄蝸廬土室義命自安者二十六年兒輩讀
書不得力旣無卓識今所遭水窮山盡無能自振
歸來躬耕養親教子尙有桑榆可收而僕僕不止
無益也惟先生教之他不敢混寄自製芥片三觔
切白黃香八函家製長巾四幅圖畫兩頭并錦片

四圓所謂千里鷺毛然一月來病中看兩閩人手
製頗竭心力惟一咲存之楊枝小奴何物細微亦
沾筆墨烏屋垂青推及蟣蝨第悵秦簫福薄已成
廢人經春頭目如錐復臥不起矣因先生垂注并
爲及之伯紫老兄統惟叱致臨穎銘感不盡

命南海程周量

數年僻處遐陬日與魑魅爲群又極其所遭至兩
兒主中饋者虛無一人愁困苦憊幾難告語推折
之極每仰望雲霄輒欲扶病策蹇竟到長安與知
已如我周量先生淝水先生傾倒生平伸吐鬱壹
乃以老母在堂不敢遠離徒深結塞且豚子久滯
不歸兩世衰老晨夕倚閭殘臘雪深數尺正欲走
一疾足呼之速回以圖團聚兼卸一肩忽楊枝返
舍捧誦手教叙述纏綿垂注憫惻并展箋讀和韻

十二大章琳瑯之聲與金石肝胆共爲傾瀉反復
迴環爲之慨歎數十年來多少死生之約車笠之
盟貧賤患難之友既往者無論已今茲交遊頗多
富貴乃昔譽我爲殊才異稟今指爲侗愚矣昔尊
我爲老成耆舊今抑掄爲老而無用矣昔稱我爲
經世爲清流爲千古高誼今羣咲爲不合時宜矣
昔訪詢我以前賢往事謬許我爲巋然靈光今則
憎以爲不識忌諱甚者訕詈爲妄誕無稽矣昔一
諾取我千金片言許我平生今則掉臂不相顧交

口爭下石矣甚者以是爲非反德作讐如曩與泥
水先生言懷詩有趙竟讐杵嬰羊乃以酖告無嫂
詆陳平麥舟適客暴諸句矣卽有爲我髮指從前
諸事者近且以三至投杼矣他不具論弟七年爲
人所構詐辱百端兩兒三年喪妻傾家累債弟雖
皮骨俱盡只是不肯向人乞憐乃譖者以爲富而
友朋不察亦疑爲富焉甚有將平日赴緩急之高
誼今竟悔爲誤用者矣弟聞之不言竊自一咲茲
者獨遇先生不因介紹不藉聲譽追思先人之清

白恫惜遺民之暴棄深憐兩兒之蹉跌寥廓相許
遙結同心骨月相儷膠漆比堅且也長安如海星
斗麗天寧少鵠峙鸞停雲蒸霞蔚之儔乃眷然南
顧不遺三千里外海濱之孤子又以掌珠遙托聯
爲一家豚子不材幾在爨下必欲文以青黃登之
旃厦且來教中念小人之有母慰衰白之思兒旣
裏想於土室蠅蠹復冀詢其舊人逸事人所交棄
公獨兼收送小兒移寓諸詩如提壺刻燭惱我十
日與十日九回并致望於春風給扎諸句則賤父

子之與先生真是夙因非徒今契矣茲以楊枝來
都正在足痛欲僵呻吟踰月夢中囁語仰和來美
書之素紈又再和淝水先生共成二十四絕雖才
盡之人無能追步萬一然目前裏抱疇昔意氣稍
露于追和嚮往之中更求同淝水先生一爲教和
年來誓焚筆研昨冬有數客強二復三歲寒
倡和今得借光移寓斷句謹錄一冊命小兒奉請
批削雖不免見獵然聲韻之外別有淚痕杯酒之
間總凝霜雪倘賜以弁首數言大約淋漓慷慨發

其悲涼鬱勃之近致足矣詩不足存也近年惟有
權關及吾鄉衡文一席得邀天幸借重鴻鉅使蓬
蒿野人一覲山斗而叨樾蔭近聞 御座書名恐
大用伊邇惟有仰瞻慶幸已耳何時握手一罄未
罄臨穎悵悵

俞曹秋岳先生詢救荒書

救荒之權造命君相不待言矣然士君子苟存心於利物于人必有所濟則救之一字似乎人人可爲也君之賑在于發相之賑有時而矯發士君子之賑有私其家而莫施其勸有不待勸而傾家以徇人者此皆有天焉莫不因乎時因乎地因乎勢在實實有經濟者善能近取譬之方殫從井救人_{之術}然後仁心仁政可得而施也譬如難米遇不如平平有并不使之平者給米錢不如煮粥古之

興土木侈讌遊者正不必沾沾到口也蓋有所爲
不如無所爲而爲之大無所爲而爲之大更不如
恒其所爲而爲之之實又在當事者酌乎時因其
地隨乎勢一爲變通也但從來賑荒苦于君相之
好名而大吏奉行之不實今

君相發賑無厭大吏不憚寒暑躬行于冰雪稽天
之漫之間惟力是視獨富貴大家閉戶漠然僻地
有司循行故事正恐東南水旱蝗蝻之隱憂未必
不起于一隅而富貴諸大家勢必先逢其患上天

好生不惟愛人亦兼愛物此數十萬流離傷心切
骨不待言矣試看此百千億萬之蝗自山左而浙
西彌天蔽日不知幾千里而又生蝻無算雖不傷
禾稼而人物兩者必有一傷天亦何意而生此百
千億萬之物命閉口枵腹遊行于數千里之間而
驅之江海捕填坑塹每一靜思此恫癢不切之人
悠忽久之恐一旦全失所恃彼時擁厚實與司命
一方者欲分以與人推以濟人爲莫及耳不肖三
十年來救荒者三辛已幾于傾家壬辰幾于隕命

然幾于傾家隕命者實實能行其志也惟庚戌之冬權不在手力不從心雖假貸四五百金佐之毫不得力以此遂鬱鬱成危病經年亦時勢使然也先生救時宰相抱膝而觀天人之微洞如指掌亦何所取于乾螢老蠹來教鄭重真切令從故帑堆中拾此陳言以進恐不足當一掩口然旣承明命不敢不竭其愚伏枕口授以對何時負笈一遂瞻依或能盡所未盡耳諸載另札統惟台鑒不宣

附狄岳先生來書

先生詩文滿天下世有元禮龍門之目其在第
胃臆聞者久同于謀面也嶠公從江上捧大著
而還風雪夜篝燈讀之字字挾吉祥氣噓饑骨
而能語乃知向來以詩文相推重者淺之乎窺
先生也李令君易水樸儒宜民多効自非匡持
不易及此顧旱潦頻仍南北相望水繪庵中沉
幾靜理必有洞察其微爲救時良畫者弟竊因
嶠公請萬一幸慨而教焉